


DUDONAN

AWIG - AWIG



DESA ADAT PAKRAMAN KUBUSALYA

DESA SUKAWANA

KECAMATAN KINTAMANI

KABUPATEN BANGLI

KAMIS 4 APRIL 2019

MURDHA CITTA

Om Awighnamastu nama siddham

Melarapan saking asung kerta lugraha, Ida Sang Hyang Widhi Wasa ngawentenang kahuripan sekala niskala, Ring Bhuana Agung lan Bhuana Alit. Manut dresta Desane wantah pawakan pasayuban Krama Desa rawuhing kula warga pawongannia. Desane keanggehang Bhuana Agung, Pawongannia soang – soang pinaka Bhuana Alit.

Sotaning Bhuana Agung, Desane wantah pawakan Bhuana maurip jangkep saha Tri Hita Karananyaluire :

Ha. Prahyangan, sahananing kahyangan, penyiwian Desa genah ngarcana Ida Hyang Parama Wisesa pinaka atma Desane;

Na. Pawongan, krama saha warga desa maka sami maka pawakan Tri Kaya, mawaning desane sida molah maprawerti;

Ca. Palemahan, tanah kakuwuban desa sinanggeh stula sariraning desane.

Adung patemoning Bhuana Kalih, malarapan cantu jagadhita, sinaggeh murdhaning prayojanapang riptaning awig-awig Desa Adat / Pakraman ring paseban mami krama desa adat.

Pinaka putusing paseban; wastu prasida, prayojanan mami kabeh prasama angidep muwah amagehaken kadi ling ing awig-awig iki.

PRATAMA SARGAH

ARAN LAN WAWIDANGAN DESA

Pawos 1

(1) Desa Adat puniki mawasta “ DESA ADAT KUBUSALYA “

(2) Jebar kakuwub wawidangannya mawates nyatur

Ha. Sisih wetan ring “ DESA SUKAWANA “

Na. Sisih Kulon ring” DESA KUTUH “

Ca. Sisih lor ring “ DESA SUBAYA “

Ra. Sisih Kidul ring “ DESA BANTANG “

(3) Desa puniki kawangun antuk karang desa utawi gebogan krama, turmaning kepah dados ADAT / BANJAR, Luire :

Ha. Banjar / Tempek DINAS

Ca. Banjar / Tempek DINAS

Na. Banjar / Tempek DINAS

Ra. Banjar / Tempek DINAS

DWITYA SARGAH

PATITIS LAN PAMIKUKUH

Pawos 2

Desa Adat Pakraman / Adat KUBUSALYA ngamanggehang pamikukuh minakadi :

Ha. Pancasila;

Na. Undang – Undang Dasar 1945;

Ca. Tri Hita Karana manut sada cara Agama Hindu

Pawos 3

Luwir patitis lan Sesanti Pakraman Adat KUBUSALYA

Ha Mikukuhin miwah ngerajegang Sang hyang Agama;

Na. Nginggilang tata prawetine maAgama;

Ca. Ngerajegang kasukerta desa saha Pawongannia sekala lan niskala.

TRITIYA SARGAH

SUKERTA TATA PAKRAMAN

Palet 1

Indik Krama

Pawos 4

- (1) Sane kabaos Krama Desa inggih punika kaluwarga sane meAgama Hindu saha ngemong karang Desa utawi jumenek ring wawidangan Desa;
- (2) Sajaba punika sinanggah Tamiyu, sane kabinayang dados kalih inggih punika sane meAgama Hindu, miwah siosan Hindu;
- (3) Yening wenten jatma kawin ngawit medesa ngenening pewartekan Anggara Kasih.

Pawos 5

Krama Desa Pakraman / Adat wenten 1 (Siki) pawos :

1. Krama ngarep, kaluwarga sane melarapan wed utawi pengrawuh saking warga Desa sewosan saha ajeg pawiwahannia.

Pawos 6

1. Ngawit Dados Krama Desa :
Ha. Mawiwit Pawiwahan
2. Panemaya tedun makrama Desa :
Ha. Nyabran Rahina Anggara Kasih
Na. Ngantos Asasih Mawiwit saking pawiwahan

Pawos 7

Tategenan miwah swadharma Krama Desa Pakraman / Adat

- (1) Tategenan Krama, Luire :
Ha. Krama ngarep, keni ayah manut kawongania

(2) Krama Desa Pakraman / Adat kadadosang

Ha. Mapuankid utawi tan tedun luire

1. Ritatkala mapawangun / nasarin, ngerabin sanggah, piasan, bale daja, bale dangin, bale dauh, kelumpu miwah paon;
2. Ritatkala meyadnya, ngotonin sane kapertama, nyakapang, masangih, mapasaksi, kicalang putra, Maturan, sakit lan patirtan ;
3. Maluasan utawi ngluang;
4. Matepetin lan slosan, matepetin salami اساسih;
5. Mapuankid sakit salami (tigang) rahina, nenten dados medal, yening sampun arahina kenak (seger) mangda masadok ring prajuru.

Pawos 8

Kapatutan krama tamiyu :

Ha. Krama Tamiyu anyar patut madana punia BERAS 100 Kg ring Desa / Banjar manut pararem.

Na. Krama Tamiyu patut polih patus marupe pitulung ring sajeroning katiben panca bhaya.

Pawos 9

(1) Wusan dados krama desa, luire :

Ha. Sangkaning pinunas ngraga, menawi kesah ke dure desa utawi nglangkungin segara;

Na. Kenorayang, duaning sampun tan prasida ngesehin solah maprawerti setata mawurug kecaping awig-awig.

(2) Sang wusan Mekrama :

Ha. Patut ngaturang ayahan ke Desa;

Na. Tan polih pah-pahan sangkaning padruwen desa sajawaning pah-pahan padruwen ring tempak manut pararem;

Ca. Tan Polih pasayuban sajeroning ala ayu;

Ra. Prade sangkaning rahayu, polih lekita bukti patilar saking prajuru desa polih pilahan kas.

(3) Kebebasan ring tenaga lingsir :

Ha. Mayusa 70 warsa/tahun sesuai tanggal lahir ring KTP lan KK

Na. Sungkan-sungkunan (ten sesuai umur)

Ca. Cacat pisik lan mental

Ra. Bebas ring gotong-royong miwah urunan wangunan

- (4) Menawi wenten alit alit sane putus sekolah ring jenjang SD nika keni pamidanda 3 meter batu sakewanten dados kagentosin antuk jinah manut pangargan batu.
- (5) Yening pet prade wenten Jatma mamukul Jatma tios (berkelahi) keni pamidanda 300 kg beras.
- (6) Yening wenten Jatma nguug (merusak) genah suci Jeron utawi umah, barang-barang, tanduran muah sane tiyosan keni kapidanda 300 kg beras tur mecikang sane karusak kadulurin bukti lan saksi.
- (7) Yening wenten Jatma mabuk (punyah) ngamuk tur ngancam keni kapidanda 300 kg beras, kadulurin saksi.
- (8) Yening wenten Jatma ngurugada (ngubat ngabit) ring lingkungan desa lintang ring jam dase/22.00 WITA wirang Jro pengaiman (pecalang) yen nenten nganuutin keni kapidanda 100 kg beras.

Palet 2

Indik Prajuru Lan Dulun Desa

Pawos 10

- (1) Desa pakraman/Adat Kubusalya Keanter antuk Bandesa Adat Utawi Kelian Desa Pakraman.
- (2) Banjar utawi Tempekan Keanter Antuk Kelian Banjar utawi Kelian Tempek.
- (3) Bandesa, Prajuru lan Kelian Banjar patut:
 - Ha. Keadegang melarapan antuk pemlihan olih paruman soang-soang, nyabran 5 (limang) warsa sajawaning wenten parindikan tios tur dados kapilih malih.
 - Na. Maduluran Dewa Saksi Ring Pura Desa

Pawos 11

- (1) Bandesa utawi Kelian Pakraman kesanggra antuk:
 - Ha. Patajuh utawi Pangliman pinaka wakilnia,
 - Na. Panyarikan Pinaka Juru surat,
 - Ca. Patengen pinaka pangemong druen Desa,
 - Ra. Kasinoman pinaka Juru arah akehnia manut awigunan saha magilir nyabran sasih.
- (2) Sajeroning ngenterang sukerta niskala, Bandesa misinggihang pamangku kahyangan Desa
- (3) Prajuru ngadegang Panglingsir utawi Dulu utawi Pamucuk sinanggeh Kerta Desa, sane mawiwit prajuru lepas, sang wikan ring adat agama, adlri sinanggeh panua kesarengin juru surat saking penyarikan desa.

Pawos 12

- (1) Swadharmaning Bandesa Pakraman/Adat lulra:

- Ha. Ngenterang pelaksa sadaging awig-awig miwah perarem desa;
Na. Nuntun tur ngenterang krama rawuhing warga desa ngupadi kasukertan antuk patitis;
Ca. Mawosin kalih niwakang pemutus marep ring wicara warga desa;
Ra. Maka duta matemuang bawos ring sapa sira ugi.
- (1) Prade Prajuru utawi dulu iwang panglaksa keni pamidanda nikel ring kaiwangan soang-soang krama saha kangkat kararyanang manut pararem.

Pawos 13

Patias utawi olih-olihan Prajuru utawi Dulu Desa luire :

- Ha. Luput rerampen (Peson-peson);
Na. Polih tanding tengah;
Ca. Petias sewosan manut pararem.

Pawos 14

- (1) Prajuru utawi Dulu Desa kagentosin riantukan :
Ha. Seda;
Na. Kanorayang duaning iwang pamargi manawi nilar sesana;
Ca. Wit saking pakayunan utawi pinunas ngraga.
- (2) Nganorayang utawi ngentosin Prajuru utawi Dulu-dulu patut sejeroning paruman tur keingkupin antuk Krama Desa.

Palet 3

Indik Kulkul

Pawos 15

- (1) Kulkul ring Desa luire :
Ha. Kulkul Desa;
Na. Kulkul Banjar;
Ca. Kulkul sekaa-sekaa.
- (2) Tabuh tetepakan kulkul Desa :
Ha. Atuludan lambat, tatengeran tedun ngayah;
Na. Atuludan bulus, tatengeran kepencabhayan.
- (3) Tengeran Kulkul ring soang-soang hebanjaraan :
Ha. Kalih tuludan bulus, tatengeran ngerorod (Nganten);

Na. Kukul kelayu sekaran (Lina):

1. Atuludan lamban, tengeran mitahuang (kukul desa)
2. Akalih tuludan lamban selanturnya, nedunang banjar.

Pawos 16

- (1) Kukul Desa utawi Banjar tan wenang katepak yening tan sangkaning pituduh Prajuru Desa, utawi Prajuru Banjar sejawaning tengeran kepancabhayan.
- (2) Sang nepak tan sangkaning pituduh patut digells atur supeksa maka buatan panepaka, yan tan sapunika, patut sang mawurug kadanda 100 Kg Beras maut pararem.
- (3) Kukul Sekaa-sekaa, semalih kukul pondokan tan keluarga nyawerin (matehin) sukat utawi tengeran kukul Desa / Banjar prade mamurug taler kadanda manut pararem.

Palet 4

Indik Paruman

Pawos 17

(1) Paruman / sangkepan ring Desa Pakraman KUBUSALYA wenten :

Ha. Paruman Desa, kawentenang :

1. Nyabran ngasasih, maka cihna tanpa arah-arahan, duaning sampun tetep panemaya manut pararem bebanjaran soang-soang.
2. Napkala (padgata kala) maka jalaran arah-arahan manut tetujon.

Na. Sangkepan Prajuru utawi dulun Desa, kawentenang manut wiguna;

Ca. Paruman Sekaa-sekaa manut babuat.

(2) Paruman Desa utawi Banjar madudonan sekadi ring sor :

Ha. Prasida lumaksana risampun katedunin antuk sang patut ngamiletin kemanggala antuk tengeran kukul miwah mabusana adat, saha tan kalugra makta gagawan sakaluire : tan maren ngarcana ring Ida Bhagawan Panyarikan saha Widhi Widana Care;

Na. Maka sarana jagi pangawit kalaksanayang sep-sepan saha riwusannia nyacah dadosan gung alit manut pararem;

Ca. Tan kalugra ngawetuang suara ghora utawi byuta, yan wenten asapuniki keni pamidanda GURU PIDUKA beya pecamil kadi dandaning ngumanuman ring shaba;

Ra. Pamutus babawos beriuk sapanggul (ingkup) punika kamanggehang.

(3) Prade pidaging paruman tan kacumponin, mangda Prajuru Desa utawi Banjar ngililakang babawos, saha putusannia mangda kareremang antuk Krama Desa utawi Banjar, malih prade tan prasida kasungkemin jantos ping tiga, Prajuru Desa utawi Banjar dados nunas bawos ring Kerta Desa manut undangan luire kamanggeh paingkupan prajuru, ngeraris panglingsir, panguntat paruman.

Pawos 18

- (1) Sajeroning paruman Desa, Bandesa Adat / Pakraman patut nyiarang pamargi ngenterang desa, pemekas ngenenin Indik :
- Ha. Munjuk lungsuring pakraman saha ayah-ayah, sulur orta berana, druwen desa;
 - Na. Pidadab Prajuru ngenenin usaha desa kapungkur.
- (2) Pamutus paruman desa sinanggih pararem, maka pamitegep pamargin awig-awig.

Pawos 19

-) Sangkepan prajuru Desa ngewedarang rarincikan usaha desa kapungkur.
-) Sangkepan Prajuru utawi Dulun Desa tan kawenang ngwedalang tategenan ring krama sadereng kaingkupin antuk Krama Desa.
-) Pamutus sangkepan Prajuru utawi Dulin Desa ngewetuang paswara, maka daging pituduh sang ngawewenang utawi ngonekang pecak pararem Krama Desa.

Palet 5

Indik Druwen Desa

Pawos 20

- (1) Padruwen Desa Adat KUBUSALYA sakadi ring sor :
- Ha. Kahyangan Desa, Luire :
 1. Kahyangan Tiga
 2. Pura Bukit Ligundi Cemeng
 - Na. Balai Banjar
 - Ca. Tanah tegalan
 - Ra. Setra- setra palebahan, minakadi setra pakingsan, setra pengarep.
 - Ka. Pelaba pura, tegal malinggah 80 are.
 - Da. Lelanguan, makadi tatabuhan lan llen-ilen padruwen Desa / Banjar luire :

- 1 Gong Desa Adat Kubusalya
- 2 Ilen-ilen wali pura Rejang lan Baris

Ta Nyasa, sasanthi

Sa Lan Selanturipun.

- (2) Olih-olihan Desa Adat Kubusalya luire
- Ha. Paica saking Guru Wisesa

Pawos 21

- (1) Prajuru Desa Patut ngetangang pamupon laba Pura lan sapenunggalan druwen Desa.
- (2) Pikolih lan pamuponnya keanggen prabeya piodalan saha wewangunan ring Pura miwah anggen kabuatan desa adat;
- (3) Nyabran pasangkepan desa, Prajuru pengemong druwe Desa ngawentenang panindik munjuk lungsuring padruwe ring Krama Desa;
- (4) Sakaluri druwen Desa patut wenten ilikatannya;
- (5) Tan kalugra ngadol utawi ngesahang padruweyan Desa yan tan kasungkemin antuk Krama Desa.

Palet 6

Indik Panyanggran Banjar

Pawos 22

- Krama Desa rikala ngawentenang karya suka-duka, patut kasanggra antuk Banjar, luire :
- Ha. Prada ngewangun Pitra yadnya utawi manusa yadnya, manut pinunas sang meyadnya;
- Na. Pangrombo utawi karya gotong-royong krama jantos ping tiga, selangkungan punika patut katuran pangingu;
- Ca. Pangingu rikala pitra yadnya anut abot yadnya, aprada saking semengan ngantos wengi, katuran pangingu ping kalih.

CATURTAS SARGAH

SUKERTA TATA AGAMA

Palet 1

Dewa Yadnya

Pawos 23

- (1) Falinggih panyiwiyen sawidangan Desa Adat Pakraman Kubusalya, Luire
 - Ha. Pura Dang Kahyangan Bukit Ligundi Cemeng
 - Na. Kahyangan Tiga, Pura Desa/ Bale Agung, Pura Puseh, Dalem
 - Ca. Pura Tegal Sucl
 - Ra. Pura Bejl (Kayoan)
 - Ka. Pura Dalem
- (2) Rahina piodalan Soang-soang kahyangan Inucap, kadi ring sor :
 - Ha. Ring Sad Kahyangan Pura Bukit Ligundi Cemeng rikala PURNAMA KAPAT;
 - Na. Ring Kahyangan Tiga Luire :
 1. Pura Desa/Bale Agung Rikala, Purnama Kellma;
 2. Pura Puseh, Rikala Purnama Kedasa;
 3. Pura Dalem, Rikala Anggara Kasih Medangsla
- (3) Pengaci ring Pura Inucap manut Kecap Sastra Agama, saha kelaksanayang nista, madya, utama nganutin kawentenang lan pararem.
- (4) Pangempon soang-soang Pura manut Dresta kadi ring Sor :
 - Ha. Sad kahyangan Bukit Ligundi Cemeng kaempon antuk Krama Desa.
 - Na. Pura Desa Kaempon antuk Krama Desa
 - Ca. Pura Puseh kaempon antuk Krama Desa
 - Ra. Pura Dalem kaempon antuk Krama Desa lan Krama Pengejok

Pawos 24

- (1) Ring soang-soang Pura inucap kawentenang pemangku.
- (2) Ngadegang Pemangku manut dadudonan :
 - Ha. Katunjuk, kapilih olih Krama Desa
 - Na. Turunan utawi ngewaris.
- (3) Tan Kawenang keanggen Pemangku, luire :
 - Ha. Cedangga, luire peceng, perot, cungh, lan sapinunggilannya;
 - Na. Sang sapisira ugi sane tan kapatutang manut pararem;
 - Ca. Sakit Gila, ayan, buduh wiadin edan;
 - Ra. Sane madrebe kasucian urip tan becik.
- (4) Prabea Kapamangkuan :
 - Ha. Madiksa Widhi (ngewintenin) kemedalin saha kelaksanayang antuk sang ngadegang makadi krama desa utawi pengempon pura soang-soang;

Na. Pitra Yadnya ri wekas prade kulawarga pamangku tan mrasidayang, patut kasungkemiantuk krama krama desa utawi pangemong sanistania brahmana prayascita manut pararem.

(5) Pamangku patut ngamanggehang sesaning Pamangku, luire tan wenang ajajudan miwah sane siosan.

Pawos 25

(1) Swadarmaning pamangku luire :

Ha. Ngenterang upacara piodalan ring kahyangan utawi ring soang-soang pakubon krama;

Na. Tan wenang salab-sulub, yan mamurug wenang pamangku Inucap nyepuhin raga;

Ca. Prada salah sinunggil pamangku kapialang utawi cuntaka, kengin nyelang; pamangku kahyangan tiga tiosan;

Ra. Semalih yan sampun pamangku tlgang rahina ring pura kancit wenten kulawargannya utawi pisaga lan pengarep lian, pamangku Inucap tan keneng cuntaka sakewanten pamangku tan budal salami piodalan.

(2) Petias utawi olih-olihan pamangku, luire :

Ha. Penyolasan miwah sarin canang

Pawos 26

(1) Pamangku kagentosin riantukan :

Ha. Lina;

Na. Pinunas ngeraga, menawi kageringan lan sapanunggilannya;

Ca. Kawusan antuk krama menawi melaksana sane tan patut (asta dusta)

(2) Prade pamangku kawusang sangkaning melaksana asta dusta, keni pamidanda manut pararem sahe ngewaliang pabeya pawintenan pecak.

Pawos 27

Kasukertan kahyangan ring Desa :

(1) Sane nenten kalugra ngeranjing ke Pura luire :

Ha. Sane nenten kalugra ngeranjing ke pura luire:

1. Sebel kandel, ngeraja swala, salami dereng mabersih;

2. Sebel madrue putra, sajering 42 rahina, kruron;

3. Sebel pengantenan, sedereng mabiakala;

4. Cuntaka sangkaning kapademan manut sengker

Na. Sang patitis utawi anak babinjat

Ca. Makta sehananing sane kasingeh ngeletehln

Ka. Mabusana sane tan patut kadi tata caraning ngranjing kapura

Da. Anak alit sadurung mayuse tigang sasih

Ta. Sadereng polih wak-wakan (pituduh) prajuru desa adat/pakraman

Sa. Anak mobot nenten wenten sane ngakuln

(2) Busana ngranjing kapura wenang nganutin dresta minakadi;

Ha. Ritatkala ngaturang ayah, mawastra lan nylempot,

Na. Ritatkala ngaturang sembah, mabusana jangkep,

Ca. Siosan kadi ring ajeng nenten kelugra, sawawaning sampun pituduh Prajuru.

(3) Parilaksana tan kawenangang ring pura luire:

Ha. Mabawos sane kasinanggeh wak purusya, wak capala keni pamidanda Banten
Guru Piduka Ring pura inucap;

Na. Makarotan / mabacin, mawarih, masangama keni pamidanda Banten pesapuan
Manca Lima;

Ca. Nyemuh utawi nyemur pangangge ten dados ring pura;

Ra. Masumpal utawi macoran, sawawaning pituduh prajuru desa;

Ka. Ngias raga sawawaning pandita miwah pinandita;

Da. Munggah tedun palinggih sawawaning prajuru desa.

(4) Sang mamurug kadi kecaping ring ajeng, keni pamidanda pamerayascita
sepatutnyane.

Pawos 28

(1) Yen wenten jatme kerawuhang ring pure, kengin patut kepintonin prada rumasa
kasumangsayan, yen tan Wiakti jatma inucap kasisipang manut pararem Guru
Piduka.

(2) Prada kahyangan kahanan dur manggala, minakadi kapanca bhaya, pamangku patut
digelis nyadokang ring prajuru mangda marumang krama desa tur ngawentengan
upacara sepatutnyane.

Palet 2

Indik Rsl Yadnya

Pawos 29

- (1) Sang pacang madeg pandita utawi pinandita minakadi Balian sonteng, Kebayan, saluire jagi ngantenang
yadnya patut masadok ring prajuru desa, kalih parisada Hindu Dharma Indonesia.
- (2) Prajuru desa patut nitenin tur wenang ngalangin, prada wenten kacihne lempas ring kakecap miwah drestane, tur sareng nyaksiang upacara saha nyiarang ring paruman desa tegep rauhing wates kawenangaan panganter yadnya.
- (3) Krama desa patut ngaturang ayah sapamadeg miwah ring panglepas sang sulinggih ring wekas katuntun antuk prajuru.

Pawos 30

- (1) Sang sulinggih patut ngerinyinang ngrayoning ring wawidangan jagat.....
Sesampune wawu muputang yadnya ke jebar jagat utawi ke dura desa.
- (2) Krame desa sami patut sareng nitenin katuntun antuk Prajuru, mangda sahanan yadnya sane kawentenang
Kaicen pamuput olih Pandita utawi Pinandita matur kawengannya soang-soang.

Pelet 3

Indik Pitra Yadnya

Pawos 31

Dudonan pamargi pitra yadnya

- (1) Pangupakara sang lina; sane wenang ngater/muput jro mangku dalem mrajapatiampun mad
Ha. Antuk mendem utawi ngeseng, makahcina pakingsan ring Ibu Pertiwi utawi ring Bhatara Brahma
Salami nuptupang prabeye.
Na. Atiwa-tiwa (upacara pengabenan utawi palebon)
- (2) Upacara-upacara Pitre Yadnya ri wusan keabenang mewastu munggah daun bingin (ngeroras) ri sampun
Ngemargiang ngelinggihang Dewa Hyang (Bhtara Batari)
- (3) Yen prade wenten warga sios desa adat Kubusalya kapidanda jinah Bolong samas kepeng (pis let)
- (4) Sane patut keni suka-duka sane sampun madue wasta(keluarga)

Pawos 32

Swadarmaning lan tatenganan krame prade wenten sinaling tunggil warga lina:

(1) Sang kaduhkitan patut;

Ha. Nya" dokang ring klian tur nunasang tetimbangan ring kawentenanyane;

Na. Nganutun banjar ngrombo makarye eteh-ete sawa kaduluring panyembrahma canang sesidan Antuk.

(2) Swadarmaning Banjar/Desa;

Ha. Klian banjar maritatas pamargin sang kaduhkitan, napike pacang kapende, makingsan riyin Utawi lantur kaabenang;

Na. Prada kapendem, raris kawentenang kulkul patanu manut pawos 15 (3) aksare na, antuk klian banjar Utawi wakilnya.

Ca. Panyangran Banjar selanturnya;

1. Soang-soang krama banjar nedunang patus Rp.30.000.

2. Ngerombo ngaryanin eteh-ete sawa saha kasarengin antuk krama sane rauh, maksian;

3. Sami krama Banjar nganter ke setre jantos pamendem puput;

4. Tan kengin ngelelet langkungan ring 7 (pitung) rahina, tur patut polih gebagan anut paentengan Klian banjar.

5. Tan kalugra nginepang bangbang.

(3) Prade wenten lina, rikale piodalan ring pura, kengin mendem tan pasadaok tur mamargi wengi kasetra Siosan (setre pakingsan)

Pawos 33

(1) Sane kasinangeh kacuntakan sekadi ring sor;

Ha. Cuntaka antuk lina

Na. Cuntaka antuk ngraja swala;

Ca. Cuntaka antuk ngembasang putra;

Ra. Cuntaka antuk kruron;

Ka. Cuntaka antuk pawieahan;

Da. Cuntaka antuk gamia gamana;

Ta. Cuntaka antuk salah timpal;

Sa. Cuntaka antuk yening wenten anak istri mobot nenten kaupakara pabiakawonan tur pawidi Widana;

Wa. Cuntaka antuk mamitra ngalang;

La. Cuntaka antuk wenten anak istri ngawentenang putra sadurung maupakara pabiakawon Tur pawidi widanan.

(2) Sengker cuntaka manut kawentenannia;

Ha. Cuntaka kalayu sekaran, cuntakanla kantos masapuh manut dresta;

Na. cuntaka ngraja swala, 3 rahina ngawit sakeng ngraja swala utawi selamaning ngraja wsala;

Ca. cuntaka ngembasang putra, 42 rahina (abulan pitung dina) ngawit saking putrane embas Utawi ngantos sampun kaupakara makambuhan tur maprayascita manut sekadi agama lanang Wladin Istri.

Ra. Cuntaka kruron abulan pitung dina (42) rahina tur sampun matirta pamerascita;

Ka. Cuntaka pawiwahan, cuntakanya ngantos sesampun matirta pabiakaonan;

Da. Cuntaka gamia gamana, cuntakanla ngantos sesampune kapalasang /masapihan tur sampun Kawentenang pamrascita desa pakraman/kahyangan.

Ta. Cuntaka salah timpal kapuputang sekadi ring agama hindu tur dresta/adat.

Sa. Cuntaka anak istri mobot nenten kawentenang upakara pabiakaonan, cuntakania ngantos Kawentenang upakara pabiakaonan;

Wa. Cuntaka mamitra ngalang cuntakania ngantos kawentenang upakara pabiakaonan Jinah Rp. 500 000 per KK.

La. Ngembas putra nenten kawentenang upakara pawidi widana, cuntakania ngantos wenten sane Mameras sang putra, tur sampun kawentenang upakara sekadi ring ajarang Agama Hindu.

(3) Cuntaka kelayu sekaran /kapademan;

1. Cuntaka /sebel banjar rauh in 3 raine ri wusan mendem utawi sesampun polih prayascita(masapuh).

2. Kaluargania sajeroning pakarangan ngantos roras rahine.

Na. kaaben cuntakannia; Sang nyambut karye pitra yadnya cuntakania ngawit sakeng ngrancang karye rauh ruwus yadnyania (mapegat).

(4) Tan keneng cuntake luire;

Ha. Sang sulinggih lan Mangku Kayangan Tiga

Na. Ri kala piodalan.

Pawos 34

(1) Atiwa-atiwa (pengabenan) kamargian madasar antuk;

Ha. Nyawa resi (nyuasta geni),santukan tan ngagah utawi menawi tan kakeniang;

Na. sawe preteka

- (2) Panemaye pengabenan wenten 2 pawos;
Ha. Ngaben dadakan/bah bangun, kadadosang sajeroning tempekan/banjar;
Na. Ngaben ngamasa.
- (3) Dudonan pengabenan ngawit saking ngagah (lina) ngeseng ngantos pangiriman utawi nganyut

Pawos 35

- (1) Papatusan pangabenan wenten siki pawos :
Ha. Ngaben ngamasa, luire : keni patus utawi jlnah Rp.300,000
- (2) Panginune ring krama banjar ngawit makarya anut abot kawentenang karya

Palet 4

Indik Manusa Yadnya

Pawos 36

- (1) Manusa yadnya inggih punika upacara-upacara dharmaning kauripan upacara bhuta yadnya kapuput antuk jro mangku prajapati, perkawinan manusa, ngawit saking patemoning kama bang lan kama petak sajeroning garba ngantos lampus ri wekas.
- (2) Upacara kadi ring ajeng madudonan kadi ring sor :
- Ha. Magedong-gedongan duk pengerempinian ibiang;
 - Na. Duk sang rare medal;
 - Ca. Kepus udel;
 - Ra. Roras rahina;
 - Ka. Tutug Kambuhan (42 Rahina);
 - Da. Tigang sasih (3 bulan);
 - Ta. Pawetuan / oton / odalan (6 bulan);
 - Sa. Tutug Kelih (ngeraja wadone, ngembakin lanangne);
 - Wa. Matatah / Mepandes;
 - La. Mawiwaha;
 - Ma. Mawinten.
- 3) Upacara-upacara inucap kamargiang nista, madya utama manut sastra agama saha catur dresta, maka buatan Desa, ngawinang sima cara Desa.

Indik Pawiwahan

Pawos 39

- (1) Pawiwahan inggih punika patemoning purusa pradana malarapan panunggalan kayun suka cita kadulurin upasaksi sekala-niskala.
- (2) Pamargin Pawiwahan luirne:
 - Ha. Pepadikan, Kamanggalan antuk pakurenan'
 - Na. Ngerorod, ngangkat riin wawu kakurenayang,
 - Ca. Kasudiang prade pengambilan sios agama.
- (3) Pidadbdbab sare pacing mawiwahan patut:
 - Ha. Sampun manggih daha truna (prasida nganutin undang-undang perkawinan)
 - Na. Sangkaning pad arena (tan kapaksa)
 - Ca. Kasudiang prade pengambilan sios agama.
- (4) Pamargin pawiwahan mangda nganutin undang-undang perkawinan saking ngawiwenang.

Pawos 40

- (1) Pawiwahan sane kepatutang ring Desa sekadi ring sor:
 - Ha. Sampun kamargjang pabiakalutawi kesaksiang sekala niskala antuk pandita/plinandita,
 - Na. wenten pasaksi prajuru sane mapakilingan utawi nglikitayang pawiwahan.
- (2) Prabian sane tan manut kadi ring ajeng sinanggeh tan patut.
- (3) Yening jatma ngumpul kebo (nongosin) anak istri lan lanang lintang ring tigang (3) raina patut kajangkepeng antuk prajuru desa tur keni kapidanda 300 kg Beras.
- (4) Yening wenten jatne kawin keluar Desa, raris jatma punika mecala/utawi mewali budal ke guru rupaka ipun lintang ring galah tigang (3) sasih, manut ring peparuman Desa Adat, Banjar Adat, lan Banjar Dinas. Jatma inucap patut mekarya surat perceraian secara adat istiadat manut agama soang-soang.

Pawos 41

Tata Caraning Perabian:

- (1) Sapasira ugi pacang ngewarangan pakulawarga patut masadok ring prajuru, selanturnyane prajuru mapitatas, manut tan manut kecapparabiane.
- (2) Pemargin papadikan manut dudonan:
 - Ha. Pakruna jantos pang tiga, saha soang-soang malarapan:
 1. Kapertama antuk canang
 2. Kaping kalih antuk canang lan sajen
 3. Kaping tiga antuk tipat bantal, kabawos pamuput papadikan
 - Na. Risampun mapragat raris sang istri kaajak budal ring pakubon sang lanang, saha ka!anturang antuk pabiakala.

Ca. Mangda puput tumus sekala – niskala, raris kulawarga purusa makte pejati ring merajan wadone

(3) Prada ngerorod utawi merangkat patut :

Ha. Rerama lanang ngawentenang pamalaku antuk duta saksi sakiranya 2 (kalih) diri.

Na. Pagenahan antene tan kengin ring pakubon sang lanang sedereng mabiakala

(4) Sajeroning pakurenan / panglukuan patut :

Ha. Kemanggala sakeng lamarane purusa antuk geng pengampura majeng ring rerama wadone.

Na. Kaigumang bawos indik-indik pakidih utawi pelegayan arep ring pasewakan sang ngidih saha dewasa pekrabkambeyan wekas.

Ca. Kacihnayang indik kapurusa utawi prada sentana rajeg kajejerang kapatutang ngidih anak lanang sane kabawos pawiwahan nyeburin, tur risampun sulur pamerasan kategepin kemanggehan sentana nyeburin.

Ka. Prada tan terima pejati pakurenan kamarglang jantos ping tiga.

(5) Pekerabkambean mapiteges upacara tinas apadang (puput) mapikuren duaning manut kadi ring sor :

Ha. Sajeroning kabaos ambe. Kalaksanayang ring sekala-niskala antuk sarana jejauman miwah pawidi widana:

1. Jejauman pinaka ngambe / ngadungang kayun soang-soang pakulawargan wadone

2. Widi widana pinaka pejati niskala nunas wadone ring pamrajan kamulannya.

Na. Sajeroning hawos kerab kambe pelaksana ring sekala :

1. Antuk penyaksi krama banjar, duaning kakerabin manawi antuk tengeran kulkul

2. Pamekas panyaksi prajuru saha nyilikiyang.

Palet 2

Indik Nyapian

Pawos 42

(1) Pawiwahan presida kawusang malarapan antuk palas marabian utawi kapademan.

(2) Wusan mapikuren riantukan salah sinunggil lina mapiteges balu, makadi balu lanang utawi istri.

(3) Palas merabian inggih punika sangkaning mawiwit wicara.

(4) Sang ayat marabian patut atur supaksa pailikitan riin ring sang rumawos (pengadilan negeri) wastu tinas apadang pamutuse kabawos nyapian, wuku prajuru/dulu nyiarang

kawentenanya ring desa saha keni pamelin kukul manut pararem tios desa di banjar
adat Rp. 300 000, di banjar dinas Rp. 300 000

Pawos 43

- (1) Tata cara palas merabian sekadi ring sor :
- Ha. Naur prebeya pesaksi sinalih tunggil sami matenga
 - Na. Paguna kaya polih pahan pada
 - Ca. Pabekel tadtadan soang-soang kauasang niri-niri, sakewenten Indik warisan kekuasang antuk purusa
 - Ra. Ngawuruhin miwah ngupajiwa pretisentana manut swadarmaning guru rupaka
 - Ka. Naur pamidanda panumbas kukul manut pararem
 - Da. Nelung jinah manut logika prajuru/dulu
- (2) Prada riwekas sang palas kecihna adung malih, patut :
- Ha. Ngamargiang pawiwahan malih
 - Na. Kadenda Beras 200 Kg Saking palase

Pawos 44

- (1) Sang balu kabinayang dados;
- Ha. Balu luh wit sentana (sentana rajeg) miwah balu luh boya sentana;
 - Na. balu muani kapurusa (wit sentana) miwah balu muani nyeburin (boya sentana nyeburin)
- (2) Swardamaning balu inucap patut;
- Ha. Ngemanggehang pati brata tan patut ngamargiang paradara / drati krama
 - Na. Nguasayang waris guna kaya, tan dados ngadol, ngadeang, makidihang lan siosan puniki, sajawaning kabebasan saking pianak utawi kulawarga pinih tampek sakeng rabine prada okane kantun alit-alit
 - Ca. Keng:n ngidih sentana prada wenten kecumpuin antuk kulawarga sinanggeh kapurus
 - Ra. Kawenangan mawiwaha malih yen wenten kabebasan manut aksara ring ajeng
- 3) Balu Kaucap tan pageh sekadi ring sor :
- Ha. Drati krama utawi para dara
 - Na. Matilar saking pakubon tanpa sadok jantos 6 (enam) sasih
 - Ca. Lempas ring swadarma sawos-sawosan tan prasida ngesehin solah maprewerti marep ring pituduh kaluwarga purusa.

Palet 3

Indik Sentana

Pawos 45

- (1) Sentana wenten kalih pawos sane kaucap pretisentana miwah sentana paperasan
- (2) Pertisentana inggih punika sentana sane metu saking pawiwahan kapatut
- (3) Prada pawiwahan tan ngewetuang sentana kengln ngidih sentana antuk upasaksi sekala-niskala sane kawastanin sentana paperasan
- (4) Prada pawiwahan tan patut ngewetuang sentana, mangde tan kantun kawastanin babinjat utawi astra patut kamanggala antuk panyangaskara
- (5) Sentana rajeg inggih punika, pretisentana wadon (pradana) sane kamanggehang lanang (purusa) tur risampun ngelaksanayang pawiwahan nyeburin
- (6) Sang sane kearsayang sentana rajeg inucap wiwit (4) Inggih punika :
 - Ha. Pretisentana wadon tunggal utawi silih sinunggil pretisentana wadon yening makasami pretisentana wadon
 - Na. Sampun kemanggehang dados pretisentana (purusa)
 - Ca. Kapawiwahan kaceburin, kautsahayang antuk jatma sane meagama hindu utawi jatma sane meagama siosan sane sampun ngelaksayang pararisuda utawi mesudi wadani
 - Ra. Sane ngemanggehang sentana rajeg patut masadok ring I prajuru banjar tur I Klian banjar patut nyiarang ring banjar saha ngaturang ring prajuru desa pakraman

Pawos 46

- (1) Ngangkat sentana manut dudonan patut makacihna arta brana pamerasan sane kesaksiang sekala-niskala
- (2) Sapasira ugi krama pacang ngidih sentana patut masadok ring bendesa sanistana asasih sadurung pamerasan
- (3) Bendesa kewakilin antuk klian banjar nyiarang ring sawidangan desa, sang sapasira ugi rumasa tan lina mangda masengker kalih wuku sadurung pamerasan masadok ring bendesa adat
- (4) Prajuru/ dulu desa digelis maosin saha ngicenin pamutus nepet ring catur dresta miwah pararem
- (5) Prada sulur paperasan tan manut kecaping ajeng, prajuru/dulu desa wenang ngandeg sang pacang makarya, saha ngicenin pamutus mangda kapuputang riin bebaosan sulur utawi wicaraniya

Pawos 47

- (1) Paperasan sane kapatut ring desa risampun makacihna .
 - Ha. Widi widana pamerasan
 - Na. Kasakslang antuk prajuru desa sane makelingin utawi nyilikitayang
 - Ca. Kaslatang ring wawidangan desane
- (2) Sane kapatut peras anggen sentana kadl ring sor :
 - Ha. Jatma Meagama hindu
 - Na. Kulawarga saking purusa, prade tan wenten kengln saking wadon, yening taler tan wenten kengln sekama-kama (kayun)
 - Ca. Kautamayang saking waris pancer kapurusa
 - Ra. Sinalih tunggil mawiwit saking kaluwarga tunggal sanggah utawi merajan, paibon lan dadya, utawi ngambil anak tios sakewanten meagama hindu
- (3) Kengln ngangkat sentana langkung ring adiri, lanang wiadin wadon

Palet 4

Indik Warisan

Pawos 48

- (1) Warisan inggih punika arta brana saha ayah-ayahan ngupadi sukerta sekala-niskala saking kaluhurannya arep ring turunannya
- (2) Karang sinanggeh warisan luire :
 - Ha. Due tengah, mekadi tegal ayahan desa, kahyangan, pasuka siwa karena lan sane siosan
 - Na. Pagunakayan, tatadan / jiwadana, hutang piutang.
- (3) Wawu kengln kabaos warisan prada wenten :
 - Ha. Sang mapiturun (pawaris)
 - Na. katurunan (ahli waris)
 - Ca. arta brana tetegenan (ayah-ayahan) maka cihna warisan

Pawos 49

- (1) Ahli waris luire :
 - Ha. Pratisentana purusa
 - Na. Pratisentana (sentana rajeg)
 - Ca. Sentana paperasan (lanang/wadon)
- (2) Prada tan wenten sekadi ring ajeng kasinanggeh ahli waris :

- Ha. Turunan purusa pernah ngunggahang makadi rerama lanang, pekak, selanturniya, rerama misan mindon
- Na. Turunan purusa pernah kesamping makadi ponakan dimisan miwah mindon
- (3) Swadarmaning ahli waris patut :
- Ha. Nerima saha ngutsahayang tetamian pahan kaluhuraniya, mekadi ngempon sanggah/merajan, pura, pangupakaraniya miwah ayah-ayahan pawaris
- Na. Ngabenang pawaris saha ngelanturang upacara-upacara pitra
- Ca. Naurin hutang-hutang pawaris manut panglokika

Pawos 50

Mungguhing waris kewaris ring desa pakraman / adat Kubusalya

- (1) Risampun kalaksanayang pitra yadnya alan hutang – hutang pawaris buntas katawur, wawu warisan dados kepah
- (2) Para ahli waris polih pahan sangkaning pagunakaya, sajawaning karang / tegal ayahan desa kaemong antuk ahli waris kasinanggeh krama ngarep
- (3) Sinalih tunggil ahli waris kengin tan polih kahan pada :
- Ha. Nilar kawitan lan sesananing agama
- Na. alpaca guru rupaka
- Ca. sentana rajeg kesah mawiwaha utawi pratisentana nyeburin soang-soang kabaos ninggal kadaton
- (4) Boya ahli waris, kengin moponin hasil manut dudunan, lulre;
- Ha. Sentana luh, salami during kesah mawiwaha
- Na. bulu luh wiadi muani nyeburin (soang-soang boya sentana)
- (5) Pawaris kengin maweweh ri kala maurip pinaka jiwa dana, tatadan/bekel maka cihna pawewehan tetep ring okane sane kesahmawiwaha.

Pawos 51

- (1) Prade sajeroning pakeluargaan wenten ahli waris langkungan ring adiri patut;
- Ha. Kawentenang paigum indik pahan waris inucap
- Na. yen tan prasida kapitunasang tatimbang ring prajuru /Dulu-dulu
- Ca. Prada taler tan wenten campu ring panepes prajuru, patut kadauhang ring Kertha Desa; prada taler tan kacumpuin, kengin katunasang ring Sang Rumawos (Pengadilan Negeri)
- (2) Prade karang inucap kaputusan, patut prajuru/Para Dulu nibakang rung;
- Ha. Sang sinanggeh ahli waris manut pawos 50
- Na. Sang kengin anggen sentana manut pawos 54 (2) miwah (3)

- ca. Prade taler tan wenten cumpu ring panepas kerta Desa, kengin, kautsahayang ring sang Rumawos (Pengadilan Negeri)
- (3) Prade jantos karang Desa kapah utawi kasepih, patut soang-soang nedunin makrama Desa ngarep.

SAD SARGAH

SUKERTA TATA PALEMAHAN

Palet 1

Indik Bhaya

Pawos 52

- (1) Parindikan bhaya luire : Jiwa bhaya, arta bhaya (kepandangan) dura cara ring agama
- (2) Sang manggihin kahanan jiwa bhaya, patut nepak kulkul bulus mapitulung pawos 15 (2) aksara na.
- (3) Prada ring desa kahanan jiwa bhaya, patut desane ngaturang bhuta yadnya tur sang mayanin katur ring sang ngawiwenang
- (4) Prada wenten jatma mamusuh nguman uman jatma tois, kakenin pamidanda guru piduka.

Pawos 53

- (1) Sang manggihin kehanan artha bhaya (kamalingan), patut ngukul mapitulung anut ring pawos 15 (2) aksara Na, utawi sang kemalingan atur supeksa ring prajuru dulu desa sane pacang nandanin saha mawuwuh penyangaskara prada wenten jatma ngemaling barang sinaggeh suci keni pidanda upacara malik sumpah barang mewali.
- (2) Pratingkahe mapailon ring dusta kabaos sasuron, utawi prada wenten jatma manggihin maling tan nyadokang ring prajuru jantos jatma sios nyaduang, patut kadanda kadi nandaning maling, sekueh pangargan wit manut cacakan keni pidanda beras 300 Kg lan wenang kasukserahang ring sang ngawiwenang utawi barang mewali ring sang madue barang taler ten polih pelayanan.
- (3) Prada wenten jatma ngerereh reramon, minakadi daun kelapa, ron, tan masadok ring sang nruenang, prada kacunduk (ketara) patut kadanda kadi dandaning maling.
- (4) Yening wenten jatma ngeranjingin pakubon wiadin pekarangan rikala suung, mawastu sang madue karang keicalan, wenten jatma inucap katuekang antuk madue saksi ring pura bale agung.

(5) Mangde tan katuekang manut ring ajeng, asing-asing ngeranjingin kubon jatma sios patut :

Ha. Matengeran suara(makaukan)

Na. Nyantos sang nruenang karang rauh utawi masadok ring pangapit pinih tampek, maka buatan pengeranjinge

Ca. Pamedal karangia kasawenin, maka cihna pangarah rikala suung

Palet 2

Indik Karang Lan Tegal

Pawos 54

- (1) Krama Desa pangempon karang ayah desa (tanah sane tan keni tigasana) patut ngawatesin karang inucap antuk paguan/turus utawi tembok mangde pekantenannya asri.
- (2) Wates sisi kaler miwah kangin patut kakaryaning antuk sang ngamong karang ayahan inucap, sane mewasta gegaleng keluan, sejawaning tanah pacatu, tegal, carik utawi tanah padruwean ngeraga, sane kapiara watese sisi kelod miwah kauh, reh punika mawasta gegaleng keteben.
- (3) Prada keraseyang paguan / turus inucap ngelikadin, yen pada arsa penyandinge, kengin watese ngangge pinget kewanten kasaksi antuk prajuru desa utawi prancihna pai saking agrhaha.
- (4) Prada wenten karang kabebeng mangde keutsahayang wenten margi.

Pawos 55

(1) Sinalih tunggil krama desa / banjar tan kalugra :

Ha. Ngalah-alah margi, tegal ayahan desa, karang desa

Na. Ngalah-alah tanah tegak kahyangan, lan setra, sekancan tegak sinanggeh suci

(2) Prada wenten sekadi ring ajeng, sang ngalahlah patut ngawaliang tanah inucap saha mapidanda sapatutnya kadulurin upakara ring genah suci sane kelahlah

Palet 3

Indik Pepayonan

Pawos 56

(1) Ngawit nandur pekayonan, tanem tuwuh patut adepa agung ngajeroang saking wates, prada jantos ngaliwat wates wenang kasepat gantungin.

- (2) Yening pekayonan ngungkulin semallha mawastu mayanin kepisaga patut kawara antuk paiguman ping ajeng prasida sang ndruenang wit ngerebah utawi notor
- (3) Prada sampun kewara taler tan wenten usaha sang ndruenang wit, sang rumasa katetehan/kajerihan wenang masadok ring prajuru, tur risampun kaparitatas kalugra ngicalang wit inucap.
- (4) Sang keni pamidanda panyengaskara saha prebeya manut pararem arep ring wewangunan sang kerubuhan luire :
 - Ha. Sang ndruenang wit sinanggeh mayunin, prada pungkat ngarubuhin wewangunan krama sios
 - Na. Sang notor, nungul utawi ngerebah taru tur ngarubuhin wewangunan karang tios.
- (5) Krama desa patut ngemanggehang kawerdlan tanem tuwuh sane ngawinang desane asri tur lestari.

Palet 4

Indik Wewalungan

Pawos 57

- 1) Sahananing warga desa sane mimiara wawalungan (bawi, ri sampun mabelas utawi banteng lan selantur ipun sampun masaluk tali), patut sayaga nitenin negul/ngelogor mangda tan ngrusakin karang utawi pabianan kraama sios, bilih-bilih jantos ngletehin kahyangan.
- 2) Prada wenten wawalungan malumbar utawi ngeleb ngerusakin karang/pabianan krama sios, ri sampun kewara kengin kataban tur kadanda ngewaling wit sane karusak saha nawuh panebas papiaran tetaban anut panglokikan Prajuru Desa.
- 3) Pdada jantos ngletehin tegak suci minakadi pamerajan (sanggah kemulan), risampun kaparitatas antuk prajuru wenang sang nruenang kadanda mabuhu agung, tebasan prasista, durmangala, utawi panca sata iwak bebek belang kalung, prada jantos ngletehin kahyangan: tiga utawi pura pamaksan.
- 4) Krama desa patut ngerayanin wawalungan miwah sarwa prani, tan kapatutang maboros paksi miwah nuba ulam lan siosan punika.

Palet 5

Indik Wewangunan

Pawos 58

J Nyabran ngewangun patut

Ha. Masadok ring prajuru, ping ajeng prada wewangunan nganinin wates

Na. Ngangge Asta Bumi miwah gagulak Asta Kosala Kosali, sanistane manut patitis
niskala

Ca. Tan ngayubin kapisaga

J Prada wewangunan jantos nyayubin bilih bilih temboke ring telengin wates risampun
kawara tur kasadokang ring prajuru, wenang kadanda manut pararem, saha tembok
mupat kagubar utawi sanistane mangda kakaryanang abangan

SAPTAMA SARGAH

WICARA LAN PAMIDANDA

Palet 1

Indik Wicara

Pawos 59

J Sane wenang maosin makadi mutusang wicara ring desa inggih punika Prajuru Desa
sinanggeh kerta desa:

Ha. I Klian banjar, pradene sang mawicara sane patunggil banjar

Na. Bendesa adat / pakraman prade sang mawicara sami-sami ring patunggalan desa,
Desa adat/ pakraman

J Tata dudonan maosin saha muputang wicara warga desa kadi ring sor :

Ha. Kaping ajeng kabaosin antuk Klian banjar

Na. Tan cumpu ring panepas Klian banjar katunasang ring panglingsir Banjar

Ca. Paruman banjar tan kanutin kengin nunasang ring Bendesa Adat/pakraman

Ra. Bendesa adat /pakraman tan prasida muputang katincapang ring panglingsir
sinanggeh Kerta Desa

Ka. Prada taler pamatut panglingsir Desa tan kacumponin katunasang ring paruman
Desa, sinanggeh wasananing pamutus ring desa.

Pawos 60

Jahanan wicara mawiwit kacorahan sakaluire sinanggeh nungkasin daging Awig-
wig, pasuaran miwah pararem Desa utawi Banjar, Prajuru utawi Dulu Desa patut
ligelis mawosin tan nyantos pasadok.

Jajaba wicara kadi patut nyantosang pasadok sang nunas bawos

- (1) Panepase patut pastika nyantenang lwang patut malarapan Tri Pramana (saksi, lekti, bukti) miwah tan mareh nepak ring Catur Dresta.

Palet 2

Indik Pamidanda

Pawos 61

- (1) Desa utawi Banjar wewenang niwakang pamidanda ring warga desa utawi banjar sane sisip
- (2) Paniwak Inucap kamargiang olih bandesa utawi Klan banjar
- (3) Bacakan pamidanda luire :
- Ha. Ayah an panukun kaslisipan
 - Na. Denda arta (dosa, denda saha panikel paturunan)
 - Ca. Rarampangan
 - Ra. Kadaut karang ayahannya, utawi kasepekang
 - Ka. Penyanggaskara
 - Da. Kawallang pipilnyane (kawusang makrama)
- (4) Pamidanda sane katlwakang patut masor slinggih manut ring kasisipane
- (5) Jinah utawi raja brana pamidanda ngeranjing dados druwe Desa/Banjar.

Pawos 62

- (1) Krama sane langkung ring tigang paruman ngelantur tan nawur urunan miwah dadendan wenang karempag;
- (2) Rarampagan ngangge tata cara kadi ring sor :
- Ha. Kalaksanayang antuk kasarengin krama desa sekehe tigang diri maka saksi
 - Na. Sang ngarampag saking darsana ngambil barang utawi nyawenin tanem tuwuh, akehnya manut ring hutang sang karampag
 - Ca. Prajuru mapiteketang mangde barang-barang sane karampag digelis katebus, masengker awuku ring rahine pacang kaadol.
 - Ka. Tan ngenenin saluwir barang sane patut inggilang manut agama miwah mademang pangupa jiwa sang karampag

Pawos 63

- (1) Prade sang pacang karampag ngewara (ngalangin) pamargi inucap mawastu sampun tan nganutin awig-awig desa wenang karang desa sane kagenahin kadaut antuk desane utawi kasepekang

(2) Semalih yen purun taler ngalangi paridabdab kadi ring ajeng tan wenten mamargi sajawaning kawaliang pipilnyane (kawusang makrama)

(3) Pamidanda inucap ring ajeng keni buntas risampun sang kekenenin

Ha. Nunas geng pengampura ring Krama Desa riantuka nguak pasubaya (pararem) pecak

Na. Nawur pangargan panguak pasubaya duk pacang karampag kadulurin prasista

ASTAMA SARGAH

NGUWAH-NGU'WUHIN AWIG-AWIG

Pawos 64

(1) Nguwah-nguwuhin Awig-awig Desa puniki kamargiang antuk paruman Desa.

(2) Paruman inucap mangda kadasarin antuk pakarsan krama desa adat yadiastun kemedalang antuk prajuru sinunggal wladin sinarengan.

(3) Awig-awig puniki kamargiang ngawit kalngkupan (kararemin)

Pawos 65

(1) Sakaluining sane wenten saderengnya patut kaanutang ring sadaging Awig-awig puniki

(2) Sakaluring sane during kabawos sajeroning Awig-awig puniki kamargiang manut tata cara sane sampun ketah mamargi kadulurun antuk pararem-pararem

NAPAMA SARGAH

SAMAPTA

Pawos 66

(1) Awig-awig puniki kawastanin Awig-awig Desa Pakraman Kubusalya

(2) Awig-awig puniki kamargiang ngawit kasungkemin ring paruman (04 April 2019)

Pawos 67

(1) Sakeluir sane wenten saderengnya patut kaanutang ring sadaging Awig-awig puniki

(2) Sakaluring sane during kabaos sajeroning Awig-awig puniki patut kamargiang manut tata cara sane sampun katah mamargi kadulurin antuk pararem.

Pawos 68

Awig-Awig ring Trun-Truni / Muda-mudi :

(1) Wenten salah sinunggil sekehe Truna-truni sane nenten nganutin kegiatan, urunan, dadendan nenten katawur jatma punike nenten ngamolihang pelayanan ring Banjar Dinas, Desa Adat lan Banjar Adat.

Pawos 69

- (1) Awig-awig puniki ring paruman duk rahina...~~WAPASAT~~.....pinanggal...~~7~~...sasih...~~KEDASA~~...1914...Icaka, warsa. 2019, tanggal...~~7~~.....masehi...1914.....ring Bale Desa pakraman/Adat Kubusalya
- (2) Awig-awig puniki kalingga tanganin antuk Bandesa, kasarengin Klian-klian Banjar saha kasaksiang antuk Klian Banjar Dinas miwah Perbekel sawidangan Desa Adat/Pakraman...~~KUBUSALYA~~.....saha kapikukuh antuk Bupati/Walikota
- (3) Luir sang ngalingga tanganin :

1) Bandesa Adat Kubusalya
Ttd/cap



I Ketut Benben

2) Klian Banjar Adat
Ttd/cap



I Nengah Sukadarma

3) Klian Banjar Dinas
Ttd/cap



4) Camat Kintamani
Ttd/cap



5) Perbekel Desa Sukawana
Ttd/cap



I Ketut Nonog

6) Ketua PHDI Kab. Bangli
Ttd/cap



7) Departemen Agama Kab. Bangli
Ttd/cap

8) Bupati / Walikota Kabupaten Bangli maka murdha pamikukuh


Mengetahui :

Tanggal :

Reg. Nomor :

Bupati / Walikota.....

Ttd/cap



.....